



Bevor mr do looslegge, wott ich vo Dir wüsse
 Wär ass Du bisch? Kasch s ganz kurz umrisse?
 So wurds villicht eifacher, sott-ys verstoooh
 ischs Wahn- oder Irrsinn oder bisch wirgglig so
 vollkomme plemplemm und findschs legitim
 Di Stumpe go rauche uf-em-e Fass voll Benzin?

Aso ich bi dr Andi, s freut mi ganz fescht!
 Y bi moll so frey und mach do-n e Tescht:
 und stell die Froog grad zrug an Di sälber:
 Bisch Du eins vo däne sältene Kälber
 wo ihri Metzger gärn dien ussueche?
 Rugg uuse drmit! Wenn's goht ohni z flueche!

Nundefaahne, jetzt bring mi nit druss!
 Will zerscht gfrogt ha-n ich und Du wyychsch mr uss!
 Als Durchschnittsgloon fählt Dir ganz klaar
 nit numme s historische-n Inventaar.
 Schreysch: Kinderschänder! Sklaavetriiber!
 Massemörder! Wo fyys isch zu Wyyber!

Eso stohts doch gschriibe, mueschs numme no lääse!
 Y ha das gmacht und Du nit, Du jääse
 Boulevard-Journalischt! Sehschs denn nit?
 Die kömme mit Hass und mit Gwalt und so Shit
 wie steinige, köpfe, versklaave und plooge.
 Ihre Gott dä isch bös! Kasch unsere frooge!

Wurd d Antwort uff die Froog wirgglig lohne?
 Wurds Di freue, gäbts Krieg wäge Religioone?
 Wurdsch aanestoh mit Gwehr und Gamälle?
 Und schiesse uff alli mit Bärt und uff sälle
 wo am zähni Zoobe-n im Quartier
 no Schoofskäs verkauft und e Kische Bier?

Gib gschieder Antwort uff d Geegefroog:
 Bisch hütt - dänggsch mol kritisch - grad islamophob?
 Sinn Sorge verbotte, sinn Kummer und Ängscht
 nütt als Dämoone, Bländwärc und Gspängscht?
 Mach d Auge-n-uff und lueg was passiert!
 Seisch was de dänggsch, wirsch am Änd massakriert.

Und wenna kei Krieger macht mit sim Gwehr
 ischs politisch korräkt tarnti Geegewehr
 wo kritische Stimme ganz schnell losst verstumme.
 Si ruggt Di in d Nööchi vo fyys, dumme
 Rattefänger und Ummeblärer.
 Wohär kömme-n all die Nationaleuropäer?

Wär forderet d Yyfiehrig vom Schafott?
 Was hesch verzelt vo Dim liebende Gott?
 Wär meint, alli Mensche sinn gliich?
 Was isch passiert in däm dritte Riich?
 Wär interpretiert do d Meinigsfreyheit?
 Was sott Satire, hett dr Bundesroot gseit?

Dä Spruch vo dr Leuthard, e Randnotiz:
 Isch vom Comité gstoohle, ganz e bitz.
 S sey quasi in Ornig, schloosch ab und zue queer.
 Gitts Regglamazioone, denn wird aber sehr
 schnell abruggt vo sottige Posizioone.
 Und zygig doo mit Subvenzioone.

Kumm zrug zum Thema! Loss die doch mache!
 Meinsch wirgglig? Y glaub grad bi sottige Sache
 zeigt sich s Dilemma, wo mr drinn stegge:
 Haltsch lieber dr Latz oder wotts umsveregge
 saage was halt gseit wärde sott?
 Stohsch lieber grad aane oder buggsch Di bigott?

Hesch no wyteri Frooge, wo ohni lang z briete
 dr Roger Schawinski en Antwort ka biete?
 Nei, Land gsehn-y keins, I versuff in dr Fluot
 uss all däne Frooge, Angscht und au Wuot.
 E-n Art e Staumuure wäri no guet.
 E diggi Wand, wo Di schütze duet.

Wie sälli in China, uffbaut vor de Russe?
 Jä dött hetts Barbaare! Die wäre denn dusse!
 Und im Süüde so eini wie im Jordan im Weschte?
 Bi Terroraschleeg nutzt das glaub am beschte.
 Oder wie in Texas e-n-elegtrische Haag?
 Wenns koschte dörf und s dr Staat vermaag.

S Lääbe wär liichter, s gäbt friidligi Zytte
 vorussgesetzt stohsch nit uff dr lätze Sytte
 vo däne Muure. Falls doch denn hesch gschisse:
 Die sinn derart stabil die ka keine-n yrisse
 au wenn De frontaal drgeege rennsch.
 Hinter dr Muure merggt das kei Mensch.

Dr Gorbatschow hett s Problem klar erkennt:
 Dr Muurfall z Berlin isch e Non-Event
 vergliichschs mit de Wänd wo mr hütt uffe ziehn.
 Gitts en anderi Löösig? Oder glaubsch nit mr miehn
 jetzt voll an d Segg - suscht bluete mr denn.
 D Froog isch doch nit ob, d Froog isch numme wenn.

Wie wotts das verbueche? Über wäm sini Konte
 läuft das Spiil ohni Gränze, mit numme no Fronte?
 Fiehart dr Wäg zum Siig über d Abwehrketti?
 Forsiersch d Offensiive und deggsch si komplett y
 mit Schüss uffs Gool uss allne Laage?
 S Matschblatt stoh noonig, aber eins ka Dr saage:
 En eifachi Löösig findsch nit, do wett-y:
 Numme-n öppis schyynt klaar: Je suis Bebbi

D Ladäärne stoot am Zischdig bim Minschter.
 Dört lüüchtet si häll und blibt trotzdem finschter.

Schigg di Bueb am Mittwoch Zoobe
 zu de Bebbi go iebe am Kohlebärg oobe.

Kunnsch noonig druss, um was es goht
 nimmsch s Delifon füüre und scännsch dä Code:

